

*Vangadizza*

\*\*\* *Luciano Rossi fu Michele* \*\*\*

*Tempo e paja se maùra le nèspole*

Riflessioni

(trovate e pubblicate post mortem)

Circolo Noi di Vangadizza  
( Cultura - Tempo libero )  
[www.vangadizza.org](http://www.vangadizza.org)

Parroco: don Vittorino Corsini  
335-1609444

Pro manuscripto  
2016

## Premessa

### Tempo e paja se maùra le nèspole

E' un proverbio antico che è quanto mai attuale

Ogni frutto richiede tempo ed attenzioni.

Oggi abbiamo sempre fretta e non abbiamo cura per nulla.

Il risultato è sotto i nostri occhi, il pianeta che sta andando a rotoli, in frantumi.

Luciano Rossi

-----

Opuscolo pubblicato in occasione della festa  
dell'Associazione Madri Cristiane di Vangadizza

Chi sono e che cosa fanno le persone che partecipano all'associazione??”

Che fanno? Per prima cosa la preghiera sia personale che comunitaria come il Santo Rosario al Capitello ogni 1° Domenica del mese, le pulizie alla chiesa, manutenzione agli arredi degli altari, addobbi floreali, catechismo, coro, insomma siamo un pò come la gramigna (nel senso buono).

Chi sono? Sono persone semplici con cui abbiamo a che fare tutti i giorni, sono le mamme, nonne, zie, sorelle insomma tutte le donne della parrocchia che, con semplicità, offrono la loro disponibilità per i vari servizi alla comunità parrocchiale. Con quali mezzi? Innanzitutto, tanta buona volontà' e poi, è tutta la Comunità Parrocchiale che ci aiuta e sostiene nel portare avanti gli impegni e progetti che ci proponiamo di realizzare.

Vangadizza 28 febbraio 2016

## Prefazione

L'indefessa ed amichevole opera di Lucio Martinelli, ci permette di gustare ancora altre ventisette poesie inedite, redatte, anni orsono, dall'amico Luciano Rossi, che ci guarda dal Cielo, mentre le leggiamo e le gustiamo. Ci guarda dall'Alto, dopo essersi domandato più volte, nei suoi versi, quando sarebbe stato il suo momento..., avendo la sensazione, forse, che le forze, a poco a poco, venivano meno...

Ma, le sue poesie contengono anche momenti di gioia, ammirando, per esempio, la natura e apprezzando l'amicizia, invitando ad agire bene e ad accontentarci del modesto, quello di un tempo, travolti come siamo da un progresso, a volte incomprendibile.

Leggiamo la nuova raccolta, che segue e che, con il suo contenuto, ci spinge ad essere migliori, anche nei riguardi del prossimo... per il quale, leggiamo nell'introduzione al presente libretto stesso, molte persone, donne laboriose e sensibili ai bisogni di chi ci accompagna nella vita, non solo pregano, ma s'impegnano pure in opere di bene, con slancio e grande opera di volontariato, collaborando con la Parrocchia, centro di spiritualità e di unione, avendo come meta principale, al di là d'ogni egoismo e come voleva Luciano Rossi, il bene del prossimo.

Ed è questo il meglio che donna o uomo possano fare, per personificare sentimento e bontà, dinanzi al materiale, che ci schiaccia e ci distoglie dalla via del bene. I versi di Luciano – che toccano i più svariati aspetti della vita e della terra – si basano su questi concetti, donatori di serenità e di pace.

*Pierantonio Braggio*

Verona 22 gennaio 2016

## *El tempo*

No sò per coanto tempo  
gò portà ogni ano a on eremita  
on calendario ,  
el calendario de l'ano  
a Capodano ,  
e lu' ogni olta el lo rodolava ,  
el lo metéa sóra a chéi altri  
so 'na carèga  
ne la camara da leto  
in do' 'l dorméa .  
'Na olta sola l'è stà ciapà  
da on momento  
de curiosità  
el ghe n'à srodolá uno a caso .  
“De che ano èlo, passà coando ?  
No me ne son gnanca incorto “.  
Proo, n'antro,  
anca coesto l'è passá .  
Coando ? No lo so ,  
e adesso in do'èlo ? “.  
El tempo par lu' el jera uno solo ,  
védarlo cossita diviso  
l'é stà ciapá da on rimorso  
cossita potente  
che el giorno dopo a l'è morto .

## *Fusse che fusse la olta bona*

La note de l'ultimo de l'ano  
eto butà via  
tute le robe vece ?  
Tuto, via de do ,  
i ani e i dolori .  
E allora cosa serve butare  
le robe che te voressi tegnere  
e esser costreti a tegnere  
le robe che te voressi butare ?  
Se fa quel che se pol .  
Fuse el fin  
a olte bon !  
Purtropo se fa soltanto  
quel che se pol .

31 dicembre 2012

## *Misteri*

Come fai zerti Stati escluso el nostro  
a essere indebitè ,  
se con le machinete in tuti i bar ,  
legalizzando el furto con furbizia ,  
i ghe ciucia tuti i schei ai so abitanti ?

## *Misteri !*

Toléndoghe continuamente  
tuti i schei che i ghe dà a la gente ,  
dove li fai nare  
par no essarghene più ?  
Oto vedare  
che a sti popoli indebitè ,  
dopo aver dà tuto, ghe tocarà  
anca essare deportè in schiavitù  
fin che no' i g'avarà pagà ?

1 dicembre 2011

*“ La caduta degli dèi ”*

Fede nei schèi ;  
no' i serve a gnente .  
Fede nel potere ;  
par ordinare cossa ,  
adesso che mi no' più bon  
gnan de stare in piè ,  
che i me cambia el panolón ?  
fede ne l'amore de 'na dona ;  
la s'ha ridoto a 'na condizion tale  
che vien da pianzare a guardarla .  
Tute le me divinità  
j'è evaporà  
come neve al sole ,  
rivelandose  
'na ilusion .  
Me fao pietà .  
No' me resta che la speranza  
che qualchedun el me slonga 'na man ,  
quela de quella divinità  
che m'ha messo nel cor quel'inquietudine  
che me fa sempre zercar .

28 novembre 2011

## *El marcà de le lagreme*

Sul cantón de le pìgrafe  
morti freschi de giornata ,  
e come tali con un certo valore ;  
quei de jeri infati  
al marcà de le lagreme  
i g'ha zà un calo de prezo ,  
quei veci po'  
no i costa quasi gnente ,  
ghe n'è adiritura in regalo  
par ci no' sa ci pianzare e vol fare  
bela figura in piazza .

Ma gh'è anca  
cì no' l'è bon de abituarse  
a 'sto andamento storto ,  
vale a dire ci pianze par tuti ,  
e pianze sempre, par i quali  
i morti freschi o veci  
j'è tuti uguali .

Le robe le cambiarà - i me dise -  
se no' ghe ne fusse più de novi .  
Se l'ingranagio el se incricesse ,  
che belo che saria  
par ci volesse pianzare  
no' catare più lagreme al marcà .

28 novembre 2011



## *Vedémose, catémose*

“Ciao , ciao ,  
Possibile che se se veda  
soltanto ai funerei . Dài ,  
vedémose, catémose  
anca in altre ocasion “ ,  
i se dise tanti veci  
senza tanta convinzion .  
Ad una zerta età infati  
no’ se se zerca più ,  
e se par caso se se cata  
se vien subito ciapà  
da la pressia de lassarse .  
Da butèi, a olte, se se cata  
a scherzare col morto finto ,  
da veci se se cata  
solo se l’è dal bon .

1 dicembre 2011

## *Scherzi funebri*

De sóra la pìgrafe de Toni  
quela de Gioani ,  
de sóra quella de Gioani  
quela de Tano  
e avanti de 'sto passo  
'na pìgrafe sora l'altra .  
La mia l'ho sconta .  
Voi vedare cossa i farà  
quando i se inventarà de tirar fora  
quela par mi .

4 marzo 2012

## *Pensieri*

Finalmente  
dopo tanti sacrifici e patimenti  
l'è stà, bon de farse la casa nova,  
solo che prima de narghe a stare  
ghe tocà lassarla ... ai parenti .  
Tanto valea no afanarse tanto  
e lassar le robe come le j'era .  
Anca mi adesso ,  
costruire o lassare perdere tuto ?  
Ma guarda che raza de pensieri  
prima de morire !

7 marzo 2012

## *El vestito dei morti*

Gh'è dei morti che i va via  
con dei vestiti che j'è 'na maraveja .  
Non solo novi noventi, ma bèi ,  
de moda, sgargianti ,  
con colori de mile penèi ,  
vestiti che in vita  
no' i j'ha mai visti .  
L'è giusto presentarse a Dio  
con un vestito decente ,  
ma semo sicuri  
che nol se intendesse diversamente .

7 marzo 2012

## *La sorpresa*

'Na ventà de profumo  
de gelsomini cinesi  
so la saràja strinà e malandà  
de 'l giardin oncora indormenzà  
tra i brazzi de l'inverno.  
On sorriso fresco e s-ceto  
e on scherzo simpatico e caro  
che premia chel 'spetàre  
de cì tante olte  
ne varda ogni ano  
co la paura  
che se perda del tuto  
la sorpresa.  
Primavera po'...  
a zugàre serena:  
tra le so carte  
la gà l'asso segreto  
...del mistero.

6 marzo 2012

## *Su col morale !*

El morale generale del mondo  
sempre rasotera .

Se no fusse che ogni tanto un artista  
poeta, pittore  
scultore, musicista  
l'impiza qua e là  
qualche brugnelo de alegria ,  
saressimo sempre tuti  
ne la desperazion assoluta .

Ma se trata solo de momenti  
vagabondi e mai d'apartuto .

Manca un conforto globale  
che ghe daga a la tera  
'na contentezza totale .

15 marzo 2012

Italiano

## *'Na tassa providenziale*

On passaggio senza rivoluzion  
da un sistema, quello del capitale ,  
al bolscevismo , con sodisfazion ,  
con un tassamento providenziale .

Chiunque g'ha 'na casa paga 'na tassa  
uguale come la fusse in afito,  
compresi i pitochi che se la spassa  
in caponare o nel corgo del pito .

Un paron solo e uguaglianza par tuti .  
Basta col privilegio de la casa !  
E sempre pronti , la valisa in man ,

mobilità a partire da doman !  
E sposarse ? Basta che se se basa ,  
basi , se sa , tassè , esclusi i cornuti .

21 giugno 2012

## *Potenza del parlar straniero*

No' l'ha gnancora digerio me nòno  
la parola " spread "ch'el ghe n'ha sentio  
naltra de nova , su lo stesso tono ,  
" spending review . Chissà sa l'ha capio !

Par dire " basta co' le magnarie "  
eco che se parla ancora in inglese ,  
e tuti convinti da 'ste strambarie  
ad essere lori a far manco spese .

“ Dài co' l'inglese - me nòno l'ha dito - .  
Con " spread e spending review “ mi me sa  
che " in foot-ball " semo tuti in vià nare ,

o mejo, che ghe semo zà rivà "  
In inglese quasi quasi te pare  
che de storto ghe sia soltanto el drito .

7 luglio 2012



## *'Na oze*

Vivere nel tempo  
l'è come esser campa' in aria .  
No' te te senti sicuro de gnente ,  
no' te tochi da nessuna parte  
e in man no' te ghè  
gnan un pugno de mosche .  
I tanti ani  
ben ligà in fassine  
messi a secare in corte  
sul legnaro dei ricordi  
no' i basta ,  
nel fredo dei ultimi giorni ,  
a darte 'na piccola sbampà .  
E no' gh'è altro modo  
de stare a 'sto mondo ,  
un ganzo dove tacare  
'sta oja mata de esistare .  
Parlare con ci  
par verghe 'na spiegazion ?  
Fe' silenzio, voi scoltare :  
m'ha parso de sentire 'na oze  
drento de mi .

7 luglio 2012

## *El numero segreto deto "Pin"*

Ma guarda che modo ch'el g'ha el governo  
de no' mandarghe più ai pensionati  
su un fojèto de carta de quaderno  
l'indicazion dei schei, pochi da mati ,

che ghe speta da veci e da malè .  
Par savere i so afari come tuti  
el pretende che orbi come j'è  
i li zerca su un computer se i gh'è

e, macando co' la man malcunà  
dei botoni e dei tasti i leza in presia  
come se presenta la verità .

Deventar veci oncó ghe vole impegno ,  
tante scole, esami, essere promossi .  
Sa farai quei come mi senza ingegno ?

Dovarò darghe el me numero segreto  
a un avvocato ch'el parla par mi  
quando 'na olta con un semplice biglieto ...  
Che reson da vecio! ... avanti cossì !

29 febbraio 2012

## *El pescadore*

La me vita da un zerto tempo  
la someja a 'na anguila .  
Più zerco de strenzarla  
e più la sbrissia .  
Va a finire che la me scapa .  
E no' gh'è amo, nigossa o tamburèlo  
che la possa trategnere .  
Proprio a mi  
la g'avea da capitarme ,  
a on pescadore .

25 marzo 2012

## *Montagne*

Montagne

bele da vivarghe fin a moringhe .

Moringhe però da zoeni in goera ,

senza averghe vissù ,

l'è 'na roba che no' dovéa

(e che no' dovaria) capitare .

El conforto de le parole

“ morto da eroe “ el me fa rabiare .

Quando l'umanità

l'impararà 'na s-cianta a ragionare ?

21 maggio 2012

## *Rose senza spini*

Cossa serve  
che vegna ancora la primavera ,  
che spanissa ancora le rose ?  
J'era solito portarghene un mazzo ,  
catè co' le me man ,  
fresche de sgoazza ,  
el giorno del so compleano .  
Sì, te le porto ancora adesso ,  
ma senza védare la to contentezza ,  
senza podér darte un baso ,  
- Tanto vale che la primavera  
la sia senza fiori - .  
Eco, eto visto ?  
Me son anca ponto .  
'Na olta i spini  
i j'era sempre sconti .

13 giugno 2012

## *La casa*

L'entusiasmo de farse la casa nova ,  
secondo i propri gusti ,  
nel posto giusto  
l'è un pensiero fisso  
de quando s'è butèi .  
Ma allora no' g'avea schei .  
Adesso podaria ,  
ma no' ghe n'ho più oja  
farne 'na casa  
prima de nare via !

13 giugno 2012

## *Manco arie*

Parfin i osèi sui àlbari  
i tratien el fià  
e i canta manco che i póle  
de lujo, ne le ore brusine  
del dopo disnà  
e el massimo che i fa  
l'è un solo nel pozzo più vizìn  
par bagnarse el bèco .  
E dopo a l'ombria soto le foje  
a sognare la bavesèla de aria  
che no' ghe sarà .  
Se passa i giorni cosìta de istà ,  
senza nessuna autorità nel mondo ,  
contentandose de vivare .  
Del resto  
anca quando se crede  
de fare chissà che ,  
l'è la natura che comanda  
e se restemo al mondo  
l'è par la so bontà .

8 luglio 2012

## *La scaja*

La vita l'è come quando da buteleti  
se zugava a tirare , una a la olta, 'na scaja  
a pelo de l'acqua longo i fossi  
e quello che riuscéa a farla nare ,  
senza che la se fondesse, più distante ,  
el venzèa .

Vivare qualche ano  
piassè de un altro però  
no' l'è che la sia 'sta gran vitoria .  
La vera vitoria saria no' morire .  
In mancanza de questo  
no' vale a gnente rabiarse  
se la propria scaja  
la se fonda prima .

26 novembre 2011



## *Pareli via !*

No' .so come la sia  
che da nessuna parte  
me sento più sicuro .  
No' gh'è posto  
dove de note no' me sveja  
e me senta portar via .  
Da zoenò ridea  
de me marna che se lamentava  
de la so fantasia su 'sto tema .  
" Pensieri da veci , 'ghe disea ,  
pareli via ! " .

19 marzo 2012

## *Al balo dei moschini*

S-ciapi de moschini  
che bala sóra la brénta  
del mosto che bóje .  
Ragneti verdi che i pirla  
in mile scrioltoloni  
dai vezòti a le zéste de ua ,  
da le graspe che se alza al spinèlo .  
Postà con un gombio  
a la marléta de la porta  
de la cantina  
ponso i pensieri e guardo fóra .  
Voria che qua con mi ghe fusse ancora  
anca me marna e me opà .  
Al balo dei moschini  
ogni ano vegnéa con lori .

15 novembre 2009

## *Primo de l'ano*

Eh ! no !

Proprio el primo de l'ano !

Alora non è cambià gnente

e tanto vale restare co' l'ano vecio .

E si che s'avemo fato

i auguri de bon ano

e proprio oncò

me toca sentir 'na campana da morto.

Alora dosei dirmelo

che semo in un mondo

dove no' gh'è rispetto par gnente.

Nessun deve essere così maleducato

da morire quando tuti sé in festa .

01 gennaio 2012

## INDICE

Pag.

4	El tempo
5	Fusse che fusse la olta bona
6	Misteri
7	La caduta degli dèi
8	El marcà de le lagreme
9	Vedémose, catémose
10	Scherzi funebri
11	Pensieri
12	El vestito dei morti
13	La sorpresa
14	Su col morale
15	'Na tassa providenziale
16	Potenza del parlar straniero
17	'Na oze
18	El numero segreto del "Pin"
19	El pescadore
20	Montagne
21	Rose senza spini
22	La casa
23	Manco arie
24	La scaja
25	Pareli via !
26	Al balo dei moschini
27	El primo de l'ano